



A i plaseve un grum lavorâ il fier a gno cusin Zuanin, cussì tant che a dîs agns al leve bielzà a fâ il garzon te farie. No le mighe tant di maraveâsi pe etàt, parcè a chei timps là vie pene finidis lis elementârs a tu vevis di sielzi: o imparâ un mistîr o ben subit vie tai cjamps a judâ la famee. Jo mi visi che pene finide scuele, ancje in cuarte elementâr, o levi te fabriche di cjadreis a judâ gno pari a meti la cole tai bûs là ch'a si plantavin i fûs di len ch'a tegnin adun la cjadree, ma o jeri cussì piçul che a vevin di scugnî sentâmi sul banc parcè che no rivavi a fâlu stant in pîts; si che i compagns a mi cjolevin pal cûl disintmi: "sentât sul banc a dâ di cole". Ben po a no 'nderin sindicâts tal dopovuere e la fan a faseve passâ parsore dutis lis regulis, se mai a 'nt fossin stadis. Zuanin al saveve ben ce che e jere la fan, tant che lant a vore a buinore al veve di scugnî passâ dongje il for dal pan e, no podint sopuartâ chel odôr, al taiave vie pai trois de braide slungjant la strade par no lassâsi colâ il stomi. Tornât a cjase a misdî a i diseve a sô mari:

"Mame o ai cjapât i trois de braide dai Punts par no sintî che puce di pan ch'a ven fûr dal for di Jacum".

"Po ben - i rispuindeve agne Vigje - domenie ch'a copi il poleç a ti lassarai il durion dut par te, ch'a ti plâs tant".

"E sa tu fasis il brâf fintremai domenie a son ancje dôs caramelis par te - e zontave none Anzule - ma dome sa tu sês bon di tignîlis di cont, une supade e po tornâ a involuçâle par ch'a duri plui a lunc".

Ven a stâi: "Supe e ten cont".

E jere une filosofie di timps di vuere che, dutcâs, e scomençave a cricâ par vie che i sfolâts polesians e de Dalmazie ch'a rivavin tal paîs, a insegnavin invezit che:

"Chi sparagna la gata se lo magna";

un mût di pensâ ch'a ur deve reson, sint che a vevin scugnût lassâi a Tito dut ce ch'a vevin sparagnât a cjase lôr. Cul lâ dal timp, muarts i vecjos, e cjapave pît ancjemò une altre gnove mode economiche, ven a stâ che di:

"Spindi ancje ce ch'a no tu âs",

e inalore vie a comprâ robe a ratis, a fâ mutuis par cualsisei monade, par rivâ fintremai in di di vuê a fasi prestâ bêçs par lâ in vacancis.

Trê mûts di vivi, trê modei di economie une vore malavuâi l'un da l'altri, che Zuanin a ju veve provâts ducj, ma chel ch'a i veve restât plui tal cjâf al ere il supe e ten cont ch'a lu veve judât a parâ vie la puce di pan.

*di Bepi Zefon*